

**БОСНА И ХЕРЦЕГОВИНА  
ПАРЛАМЕНТАРНА СКУПШТИНА  
БОСНЕ И ХЕРЦЕГОВИНЕ**

**СЕКРЕТАРИЈАТ  
ЗАЈЕДНИЧКА СЛУЖБА**

Сектор за међународне односе и протокол  
Одјел за сарадњу са  
међународним организацијама



**BOSNA I HERCEGOVINA  
PARLAMENTARNA SKUPŠTINA  
BOSNE I HERCEGOVINE**

**SEKRETARIJAT / TAJNIŠTVO  
ZAJEDNIČKA SLUŽBA**

Sektor za međunarodne односе i protokol  
Odjel za saradnju s međunarodnim organizacijama  
Odjel za saradnju s međunarodnim organizacijama

*Handwritten signature*

Broj: 01, 02, 03, 03/11-05-1-1302/18  
Sarajevo, 19. 7. 2018.



**BOSNA I HERCEGOVINA  
PARLAMENTARNA SKUPŠTINA BOSNE I HERCEGOVINE  
SARAJEVO**

PRIMLJENO: 26-07-2018

Organizaciona jedinica	Klasifikaciona oznaka	Kodni broj	Broj priloga

*B*

**IZVJEŠTAJ S PARLAMENTARNE KONFERENCIJE NA VISOKOM NIVOU O  
OLAKŠAVANJU TRGOVINE I INVESTICIJA NA ZAPADNOM BALKANU I  
ŠIREM EUROMEDITERANSKOM REGIONU**

**Beograd, 12-13.7.2018.**

U Beogradu je 12. i 13. jula 2018. održana dvodnevna parlamentarna konferencija na visokom nivou o olakšavanju trgovine i investicija na zapadnom Balkanu i širem euromediterranskom regionu, a na kojoj je učestvovao predsjedavajući Delegacije PSBiH u PAM Šemsudin Mehmedović. U pratnji je bila Tea Mandilović, sekretarka Delegacije. Konferencija je organizirana u saradnji Parlamentarne skupštine Mediterana (PAM) i Svjetske trgovinske organizacije (WTO), a imala je cilj da članovima PAM-a pruži ključne informacije o najboljim praksama, naučenim lekcijama i perspektivama za olakšavanje trgovine i investicija u ekonomskim područjima zemalja članica.

Glavne teme parlamentarne konferencije bile su posvećene mogućnosti integracije država Zapadnog Balkana i stvaranja jedinstvenog ekonomskog prostora u ovoj regiji, funkcioniranju i primjeni pravila Svjetske trgovinske organizacije u regiji Mediterana, a govorilo se i o sadržaju multilateralnih trgovinskih propisa WTO-a i uticaju tih propisa na privredu država mediteranske regije, kao i o ishodu 11. ministarske konferencije WTO-a, a i aktuelnog konteksta međunarodne trgovine.

Prisutnima se na početku dvodnevnog zasjedanja obratio Đorđe Miličević, zamjenik predsjednice NSRS-a koji je poželio dobrodošlicu učesnicima i istakao da su ovakvi susreti izuzetno značajni za parlamentarnu dimenziju jer omogućavaju dijalog i traženje zajedničkih rješenja. On je također naglasio da su jačanje saradnje i stabilnosti regiona neophodni za ekonomski prosperitet, te da je velika odgovornost na parlamentima koji su nosioci zakonodavne vlasti te bilateralne i multilateralne saradnje.

Predsjednik PAM-a Pedro Roque istakao je da je ponosan na jačanje saradnje PAM-a i WTO-a na obostranu korist. Sporazum o olakšavanju trgovine je kamen-temeljac za jačanje ekonomije koja će uticati i na političku stabilnost, što je izuzetno značajan osnov i u borbi protiv terorizma i nasilnog ekstremizma, te dugoročno omogućava dobar i dostojanstven život.

Said El Hachimi, savjetnik u WTO-u, istakao je da je podrška parlamenata ključna spona između predstavnika građana, izvršne vlasti i međunarodnih organizacija. On je naglasio kako smatra da je neophodna zajednička briga o razvoju globalnog trgovinskog sistema.

Prisutnim su se obratili i Maika Oshikava, direktorica Odjela za pridruživanje WTO-a, Marco Hernandez, programski voditelj Svjetske banke, Sebastian Sosa, rezidencijalni predstavnik MMF-a, Branimir Gvozdenović, zamjenik predsjednika Skupštine Crne Gore kao i drugi ključni akteri pozvani da doprinesu ovom događaju.

Aktivna rasprava vođena je i o pristupanju WTO-u, njegovim propisima i pregovorima koji mogu da poboljšaju trgovinske i investicione tokove u euromediteranskom regionu.

Tim povodom Šemsudin Mehmedović, predsjedavajući Delegacije PSBiH u PAM-u, u svom izlaganju istakao je potpunu opredijeljenost Bosne i Hercegovine za punu integraciju svoje ekonomije u međunarodni multilateralni trgovinski sistem, uspostavljen u okviru Svjetske trgovinske organizacije i na izgradnju svog trgovinskog zakonodavstva, zasnovanog na pravilima i principima na kojima počiva ova organizacija. U tom kontekstu, jedan od primarnih ciljeva vanjske politike Bosne i Hercegovine je njeno punopravno članstvo u ovoj organizaciji, koje se očekuje nakon okončanja bilateralnih pregovora s Ruskom Federacijom. Tada bi uslijedilo zakazivanje 14. sjednice radne grupe na kojoj bi bila usvojena finalna verzija Nacrta izvještaja o pristupanju i upućena na usvajanje od strane Generalnog vijeća WTO-a.

Mehmedović je istakao da je Bosna i Hercegovina prepoznala svoju šansu u ovoj asocijaciji jer se radi o ogromnom tržištu i mogućnostima za plasman proizvoda širom svijeta, pod unaprijed definiranim principima trgovanja, bez protekcionizma. Pristup svjetskom tržištu podrazumijeva nove investicije, novi ekonomski zamah, novo zapošljavanje, smanjenje imigracija iz naše zemlje ka EU, jačanje i podizanje kvaliteta života svakog čovjeka, zaključio je Mehmedović.

"Kroz historiju smo svjedoci krupnih globalnih gibanja, pri kojima svako pokaže svoje vrijednosti-loši iz sebe iznjedre sve ono najlošije, a dobri ljudi pokažu svoje najbolje vrijednosti-ljudskost. Ovaj region je u svijetu prepoznatljiv i po jednom i drugom. Budimo svi ovi drugi. Podržimo jedni druge, pokažimo svoje vrijednosti, podstičimo u parlamentima promjene u pozitivnom smjeru, koje nam neće donijeti neko drugi. Mnogi očekuju da će MZ nametnuti rješenja koja će biti svima prihvatljiva što se neće desiti. Okrenimo se jedni drugima, obnovimo veze, trgovinske prvenstveno, tržišne, proizvodne, jer mi smo čuda proizvodili na ovim prostorima. Mnogo je privrede uništeno zbog pohlepe i korupcije u vladama, ali ostali su kadrovi, ljudi koji su najveća vrijednost i siguran sam da je želja za bolje sutra kod svakog normalnog čovjeka. Gradimo slobodno društvo", poručio je Mehmedović na kraju izlaganja.

Konferencija je završena diskusijom o tome kako više uključiti zastupnike u rad o pitanjima vezanim za djelovanje WTO-a. Oni se moraju fokusirati na ekonomske politike i strategije koje će se donositi na zakonodavnom nivou kako bi se efikasno rješavali ekonomski izazovi država i teme i regiona. Potcrtano je da članstvo u WTO-u direktno utiče na rast izvoza i priliv direktnih stranih investicija, a time i na stabilnost ekonomskih prilika. Zaključeno je da se samo uz zajednički rad i koordinirano djelovanje mogu tražiti rješenja i mehanizmi u rješavanju pitanja ekonomske saradnje, migracijskih tokova. Neophodno je uspostaviti političku stabilizaciju i mir u regionu, a na parlamentarcima je odgovornost donošenja dobrih zakona koji će u tome pomoći.

Na marginama parlamentarne konferencije na visokom nivou, u organizaciji Parlamentarne skupštine Mediterana i Svjetske trgovinske organizacije, održan je i sastanak Šemsudina Mehmedovića, u svojstvu predsjedavajućeg Komisije za vanjsku trgovinu i carine PDPSBiH sa Snežanom Petrović, predsjednicom Odbora za privredu, regionalni razvoj, trgovinu, turizam i energetiku, i Snežanom Paunović, članicom Odbora za privredu, regionalni razvoj, trgovinu, turizam i energetiku i NSRS-a, kao i ostalim članovima ova dva odbora.

Razgovarano je o saradnji zastupnika srodnih odbora dvije susjedne države, kao i o izgradnji ambijenta za regionalno udruživanje, razvoj biznisa i otklanjanje barijera koje stoje na putu lakše i uspješnije saradnje dvije zemlje. Mehmedović je u smislu integracija zemalja područja Balkana u WTO-u potcrtao da je to ogromna prilika za obje zemlje i ogromno tržište na kojem se može i zajednički nastupati ako se usaglase obostrani interesi. To je također prilika za nove investicije i nova zapošljavanja zaustavljanjem migracija s Balkana prema ostatku svijeta.

Izveštaj pripremila:

Tea Mandilović  
Sekretarka Delegacije PSBiH u PAM-u

*Tea Mandilović*

Izveštaj odobrio:

Šemsudin Mehmedović  
Predsjedavajući Delegacije PSBiH u PAM-u

Dostaviti:

- kolegijima oba doma PSBiH
- Komisiji za vanjske poslove PDPSBiH
- Komisiji za vanjsku i trgovinsku politiku, carine, saobraćaj i komunikacije Doma naroda PSBiH
- članovima Delegacije PSBiH u PS Vijeća Evrope
- Kolegiju Sekretarijata
- Sektoru za međunarodne odnose i protokol
- Sektoru za odnose s javnošću
- a/a